

TI-PNG amamas long disisen bilong memba

Veronica Hatutasi
i raitim

**TRESPERENSI
INTENESENEL PNG**
(TI-PNG) i autim tok
amamas bilong em
long disisen we
mamba bilong An-
goram, Arthur
Somare i mekim long
risain na larim ol
loman i glasim em.

Mista Somare, em
pikinini bilong Gren
Sief na Praim Minista
Sir Michael Somare i
bin risain olsem
Minista bilong Nesenel
Plening na Monitaring
long larim Ombutsmen
Komisin i karimaut ol
wok painim long ol
ripot bilong brukim
Lidasip Koud o lo i
karamapim ol lida.

Long las wik, Mista
Somare i bin tok em i
risain taim Ombutsmen
Komisin i bin givim ol
ripot i go long Pablik
Prosekyuta olsem em i

no givim mani ripot
long 2002 bilong ol
wok long ilektoret
bilong em.

I kam inap nau, plan-
ti lidaman long Somare
Gavman i wok long
kam aninit long glasim
bilong Ombutsmen
Komisin na Pablik
Prosekyuta long i no
givim ripot long rot ol i
yusim pablik mani long
ol wok long ol ilektoret
bilong ol.

Pastaim stret em
Galp Gavana, Chris
Haiveta. Helt Minista
Melchoir Pep em nara-
pela we Ombutsmen i
givim ripot i go long
Pablik Prosekyuta long
glasim. Na Deputy
Praim Minista Sir Moi
Avei i bin kamaut na
tok i luk olsem em bai
narapela we
Ombutsmen Komisin i
wok long glasim mani
ripot bilong em.

TI bos, Mike
Manning i tok disissen
we Mista Somare i

wokim em i mak bilong
gutpela lida na ol i hop
ol arapela lida i bihain-
im wankain pasin.

Em i tok planti taim,
ol lida i save strongim
sait bilong ol taim han
bilong lo i glasim ol na
painim olsem ol i asua.

Em i tok lida we i
kamap aninit long
glasim bilong lo bai i
mas soim olsem em i
no rong m aninit long lo
na i moabeta ol lida i
larim jastis i kamap. Na
kot tasol i ken soim
sapos lida i rong o i
nogat. Mista Manning i
askim ol lida long
putim opis na pipel
bilong ol pastaim na i
no ol yet.

Em i tok TI-PNG em i
no wanpela politike
opis na em i no save
sapotim ol wan wan
poliitsen o politikel pati,
tasol em bai sapotim ol
disisen ol i wokim
sapos ol i gutpela long
intres bilong kanti na
pipel.